

荊川先生右編

荆川先生右編目錄

卷二十六

夷三

虜言兵事 上漢文帝

補 鼂錯

論守邊備塞事 上文帝

補 鼂錯

論募民徙塞下 上文帝

補 鼂錯

擊匈奴議 上武帝

補 韓安國等

論伐匈奴書 上武帝

主父偃

諫擊匈奴書 上宣帝

魏相

罷邊備議 上元帝

補 侯應

受伊邪莫演降議上成帝補

谷永

論通康居上成帝補

郭舜

諫不受單于朝書上哀帝補

楊雄

諫伐匈奴上新莽補

嚴尤

乞優荅北單于疏上光武

班彪

論北單于不當封王上和帝

袁安

陳三策書上安帝補

張璠

諫伐鮮卑議上靈帝

蔡邕

安邊論上宋文帝

何承天

論處降胡上唐玄宗

王峻

契丹論契丹

上宋太宗

宋琪

議澶淵事宜

上真宗

寇準

荅詔論邊事

上真宗

錢若水

論備禦西北二虜七事

上仁宗

韓琦

論契丹不寇河東

上仁宗

富弼

論西鄙議和先防北虜

上仁宗

歐陽脩

乞戒邊城濶畧細故

上英宗

司馬光

諫西師防北虜

上神宗

富弼

荅詔問北邊事宜

上神宗

韓琦

荅詔問北邊事宜

上神宗

富弼

乞撫存北虜

上徽点示

趙 邁

隋北記

胡 壽

# 行程錄

王曾

行程錄

富  
術

荆川先生右編卷二十六

都察院僉都御史毘陵唐順之編纂

南京國子監祭酒豫章劉曰寧補遺

司業吳興朱國禎校定

夷三

言兵事

鼂錯

漢文帝時匈奴數侵邊上發兵禦之錯上書

錯言邊事諸書深究利害之實不當以文字觀之  
臣聞漢興以來胡虜數入邊地小入則小利大入則

大利高后時再入隴西攻城屠邑毆畧畜產其後復

入隴西殺吏卒大寇盜竊聞戰勝之威民氣百倍敗

此文比漢文最古尚似孫武子

兵之卒沒世不復自高后以來隴西三困於匈奴矣  
民氣破傷亡有勝意今茲隴西之吏賴社稷之神靈  
奉陛下之明詔和輯士卒底厲其節起破傷之民以  
當乘勝之匈奴用少擊衆殺一王敗其衆而大有利  
非隴西之民有勇怯乃將吏之制巧拙異也故兵法  
曰有必勝之將亡必勝之民由此觀之安邊境立功  
名在於良將不可不擇也臣又聞用兵臨戰合刃之  
急者三一曰得地形二曰卒服習三曰器用利兵法  
曰丈五之溝漸車之木山林積石經川丘阜草木所  
在此步兵之地也車騎二不當一土山丘陵受衝相

屬平原廣野此車騎之地也步兵十不當一平陵相  
遠川谷居間仰高臨下此弓弩之地也短兵百不當  
一兩陳相近平地淺草可前可後此長戟之地也劍  
槊三不當一萑葦竹簫草木蒙籠枝葉茂接此矛鋌  
之地也長戟二不當一曲道相伏險阨相薄此劍楯  
之地也弓弩三不當一士不選練卒不服習起居不  
精動靜不集趨利弗及避難不畢前擊後解與金鼓  
之音相失此不習勤卒之過也百不當一兵不完利  
與空手同甲不堅密與袒裼同弩不可以及遠與短  
兵同射不能中與亡矢同中不能入與亡鐵同此將



不省兵之禍也。五不當一。故兵法曰：器械不利，以其  
率予敵也；卒不可用，以其將予敵也；將不知兵，以其  
主予敵也；君不擇將，以其國予敵也。四者兵之至要  
也。臣又聞：小大異形，強弱異執，險易異備。夫卑身以  
事強小國之形也；合小以攻大敵國之形也；以蠻夷  
攻蠻夷中國之形也。今匈奴地形技藝與中國異，上  
下山阪，出入溪澗，中國之馬弗與也；險道傾仄，且馳  
且射，中國之騎弗與也；風雨罷勞，饑渴不困，中國之  
人弗與也。此匈奴之長技也。若夫平原易地，輕車突  
騎，則匈奴之衆易撓亂也；勁弩長戟，射疏及遠，則匈

奴之弓弗能格也堅甲利刃長短相襍遊弩往來什  
伍俱前則匈奴之兵弗能當也材官騶發矢道同的  
則匈奴之革筈木箭弗能支也下馬地闢劍戟相接  
士就相薄則匈奴之足弗能給也此中國之長技也  
以此觀之匈奴之長技三中國之長技五陛下又興  
數十萬之衆以誅數萬之匈奴衆寡之計以一擊十  
之術也雖然兵凶器戰危事也以大爲小以強爲弱  
在俛仰之間耳夫以人之死爭勝跌而不振則悔之  
無及也帝王之道出於萬全今降胡義渠蠻夷之屬  
來歸誼者其衆數千飲食長技與匈奴同可賜之堅

甲絮衣勁弓利矢益以邊郡之良騎令明將能知其  
習俗和輯其心者以陛下之明約將之即有險阻以  
此當之平地通道則以輕車材官制之兩軍相爲表  
裏各用其長技衡加之以衆此萬全之術也傳曰狂  
夫之言而明主擇焉臣錯愚陋昧死上狂言唯陛下  
裁擇

疏奏上嘉之賜國書寵答

論守邊備塞事

范 錯

漢文帝時上

臣聞秦時北攻胡貉築塞河上南攻楊粵置戍之焉  
其起兵而攻胡粵者非以衛邊地而救民死也含戾

而欲廣大也故功未立而天下亂且夫起兵而不知其勢戰則爲人禽屯則卒積死夫胡貉之地積陰之處也木皮三寸冰厚六尺食肉而飲酪其人密理鳥獸毳毛其性能寒楊粵之地少陰多陽其人疏理鳥獸希毛其性能暑秦之戍卒不能其水土戍者死於邊輸者償於道秦民見行如往棄市因以謫發之名曰謫戍先發吏有謫及贅壻賈人後以嘗有市籍者又後以大父母父母嘗有市籍者後入閭取其左發之不順行者深怨有背畔之心凡民守戰至死而不降北者以計爲之也故戰勝守固則有拜爵之賞攻

城屠邑則得其財鹵以富家室故能使其衆蒙矢石  
赴湯火視死如生今秦之發卒也有萬死之害而亡  
銖兩之報死事之後不得一筭之復天下明知禍烈  
及已也陳勝行戍至於大澤爲天下先倡天下從之  
如流水者秦以威劫而行之之敝也結胡人衣食之業  
不著於地其勢易以擾亂邊竟何以明之胡人食肉  
飲酪衣皮毛非有城郭田宅之歸居如飛鳥走獸於  
廣墜美草甘水則止草盡水竭則移以是觀之往來  
轉徙時至時去此胡人之生業而中國之所以離南  
晦也今使胡人數處轉牧行獵於塞下或當燕代或

當上郡北地隴西以候備塞之卒卒少則入陛下不  
救則邊民絕望而有降敵之心救之少發則不足多  
發遠縣纔至則胡又已去聚而不罷爲費甚大罷之  
則胡復入如此連年則中國貧苦而民不安矣陛下  
幸憂邊境遣將吏發卒以治塞甚大惠也然令遠方  
之卒守塞一歲而更不知胡人之能不如選常居者  
家室田作且以備之以便爲之高城深塹其藺石布  
渠荅復爲一城其內城間百五十步要害之處通川  
之道調立城邑毋下千家爲中周虎落先爲室屋具  
田器廼募羣人及免徒復作令居之不足募以丁奴

婢贖臯及輸奴婢欲以拜爵者不足廼募民之欲往

者皆賜高爵復其家予冬夏衣廩食能自給而止郡

縣之民得買其爵以自增至卿其亡夫若妻者縣官

上亭下落

買予之人情非有匹敵不能久安其處塞下之民祿

利不厚不可使久居危難之地胡人入驅而能止其

唐二節

所驅者以其半予之縣官爲贖其民如是則邑里相

救助赴胡不避死非以德上也欲全親戚而利其財

唐二節

唐二節

也此與東方之戍卒不習地勢而心畏胡者功相萬

也以陛下之時徙民實邊使遠方亡屯戍之事塞下

之民父子相保亡係虜之患利施後世名稱聖明其

與秦之行怨民相去遠矣

論募民徙塞下

鼂錯

漢文帝時上

陛下幸募民相徙以實塞下使屯戍之事益省輸將之費益寡甚大惠也下吏誠能稱厚惠奉明法存卹所徙之老弱善遇其壯士和輯其心而勿侵刻使先至者安樂而不思故鄉則貧民相募而勸往矣臣聞古之徙遠方以實廣虛也相其陰陽之和嘗其水泉之味審其土地之宜觀其草木之饒然後營邑立城制里割宅通田作之道正阡陌之界先爲築室家有



一堂二內門戶之閉置器物焉民至有所居作有所用此民所以輕去故鄉而勸之新邑也爲置醫巫以救疾病以脩祭祀男女有昏生死相卹墳墓相從種樹畜長室屋完安此所以使民樂其處而有長居之心也臣又聞古之制邊縣以備敵也使五家爲伍伍有長十長一里里有假士四里一連連有假五百十連一邑邑有假候皆擇其邑之賢材有護習地形知民心者居則習民於射法出則教民於應敵故卒伍成於內則軍政定於外服習以成勿令遷徙幼則同游長則共事夜戰聲相知則足以相救晝戰目相見

則足以相識謹愛之心足以相死如此而勸以厚賞  
威以重罰則前死不還踵矣所徙之民非壯有材力  
但費衣糧不可用也雖有材力不得良吏猶亡功也  
陛下絕匈奴不與和親臣竊意其冬來南也壹大治  
則終身創矣欲立威者始於折膠來而不能困使得  
氣去後未易服也愚臣亡識唯陛下財察

### 擊匈奴議

韓安國等

漢武帝建元六年

大行王恢燕人數爲邊吏習胡事議曰漢與匈奴和  
親率不過數歲即復背約不如勿許舉兵擊之安國

曰千里而戰兵不獲利今匈奴負我馬足懷鳥獸心  
遷徙烏集難得而制得其地不足爲廣有其衆不足  
爲彊自上古弗屬漢數千里爭利則人馬罷虜以全  
制其敝執必危殆臣故以爲不如和親群臣議多附  
安國於是上許和親親明年雁門馬邑豪聶一因大行  
王恢言匈奴初和親親信邊可誘以利致之伏兵襲  
擊必破之道也上迺召問公卿曰朕餽子女以配單  
于弊帛文錦賂之甚厚單于待命加嫚侵盜無已邊  
竟數驚朕甚閔之今欲舉兵攻之何如大行恢對曰  
陛下雖未言臣固願效之臣聞全代之時北有彊胡

之敵內連中國之丘然尚得養老長幼種樹以時倉  
廩常實匈奴不輕侵也今以陛下之威海內爲一天  
下同任又遣子弟乘邊守塞轉粟輓輸以爲之備然  
匈奴侵盜不已者無他以不恐之故耳臣竊以爲擊  
之便御史大夫安國曰不然臣聞高皇帝嘗圍於平  
城匈奴至者投鞍高如城者數所平城之饑七日不  
食天下歌之及解圍反位而無忿怒之心夫聖人以  
天下爲度者也不以已私怒傷天下之功故迺遣劉  
敬奉金千斤以結和親至今爲五世利孝文皇帝又  
嘗一擁天下之精兵聚之廣武常谿然終無尺寸之

功而天下黔首無不憂者孝文寤於兵之不可宿故  
復合和親之約此二聖之跡足以爲效矣臣竊以爲  
勿擊便恢曰不然臣聞五帝不相襲禮三王不相復  
樂非故相反也各因時宜也且高帝身被堅執銳蒙  
霧露沐霜雪行幾十年所以不報平城之怨者非力  
不能所以休天下之心也今邊境數驚士卒傷死中  
國櫜車相望此仁人之所隱也臣故曰擊之便安國  
曰不然臣聞利不十者不易業功不百者不變常是  
以古之人君謀事必就祖發政占古語重作事也且  
自三代之盛夷狄不與正朔服色非威不能制彊弗

能服也以爲遠方絕地不牧之民不足煩中國也且  
匈奴輕疾悍亟之兵也至如焮風去如收電畜牧爲  
業弧弓射獵逐獸隨草居處無常難得而制今使邊  
郡久廢耕織以支胡之常事其勢不相權也臣故曰  
勿擊便恢曰不然臣聞鳳鳥乘於風聖人因於時昔  
秦穆公都雍地方三百里知時宜之變攻取西戎辟  
地千里并國十四隴西北地是也及後蒙恬爲秦侵  
胡辟數千里以河爲竟累石爲城樹榆爲塞匈奴不  
敢飲馬於河置燒燄然後敢牧馬夫匈奴獨可以威  
服不可以仁畜也今以中國之盛萬倍之資遣百分

之一以攻匈奴譬猶以疆弩射且潰之癰也必不留  
行矣若是則北發月氏可得而臣也臣故曰擊之便  
安國曰不然臣聞用兵者以飽待饑正治以待其亂  
定舍以待其勞故接兵覆衆伐國墮城常坐而役敵  
國此聖人之兵也且臣聞之衡風之衰不能起毛羽  
疆弩之末力不能入魯縞夫盛之有衰猶朝之必暮  
也今將卷甲輕舉深入長驅難以爲功從行則迫脅  
衡行則中絕疾則糧乏徐則後利不至千里人馬乏  
食兵法曰遺人獲也意者有他繆巧可以禽之則臣  
不知也不然則未見深入之利也臣故曰勿擊便恢

曰不然夫草木遭霜者可以風過清水明鏡不可以形通方之士不可以文亂今臣言擊之者固非發而深入也將順因單于之欲誘而致之邊吾選梟騎壯士陰伏而處以爲之備審遮險阻以爲其戒吾執已定或營其左或營其右或當其前或絕其後單于可禽百全必取上曰善迺從恢議

論伐匈奴書

主父偃

武帝元光元年主父偃上

臣聞明主不惡切諫以博觀忠臣不避重誅以直諫是故事無遺策而功流萬世今臣不敢隱忠避死以



效愚計願陛下幸赦而少察之司馬法曰國雖大好戰必亡天下雖平忘戰必危天下旣平天子大愷春蒐秋獮諸侯春振旅秋治兵所以不忘戰也且怒者逆德也兵者凶器也爭者末節也古之人君一怒必伏尸流血故聖王重行之夫務戰勝窮武事未有不悔者也昔秦皇帝任戰勝之威蠶食天下并吞戰國海內爲一功齊三代務勝不休欲攻匈奴李斯諫曰不可夫匈奴無城郭之居委積之守遷徙爲舉難得而制輕兵深入糧食必絕運糧以行重不及事得其地不足以爲利得其民不可調而守也勝必棄之非

民父母靡敝中國甘心匈奴非完計也秦皇帝不聽  
遂使蒙恬將兵而攻胡卻地千里以河爲境地固澤  
鹵不生五穀然後發天下丁男以守北河暴兵露師  
十有餘年死者不可勝數終不能踰河而北是豈人  
衆之不足兵革之不備哉其勢不可也又使天下飛  
芻輓粟起於黃腫琅邪負海之郡轉輸北河率三十  
鍾而致一石男子疾耕不足於糧餉女子紡績不足  
於帷幕百姓靡敝孤寡老弱不能相養道死者相望  
蓋天下始叛也及至高皇帝定天下略地於邊聞匈  
奴聚代谷之外而欲擊之御史成諫曰不可夫匈奴

獸聚而鳥散從之如搏景今以陛下盛德攻匈奴臣  
竊危之高帝不聽遂至代谷果有平城之圍高帝悔  
之乃使劉敬往結和親然後天下亡干戈之事故兵  
法曰興兵十萬日費千金秦常積衆數十萬人雖有  
覆軍殺將係虜單于適足以結怨深讐不足以償天  
下之費夫匈奴行盜侵毆所以爲業天性固然上自  
虞夏殷周固不程督禽獸畜之不比爲人夫不上觀  
虞夏殷周之統而下循近世之失此臣之所以大恐  
百姓所以疾苦也且夫兵久則變生事苦則慮易使  
邊境之民靡敝愁苦將吏相疑而外市故尉佗章邯

得成其私而秦政不行權分二子此得失之效也故周書曰安危在出令存亡在所用願陛下熟計之而加察焉

書奏上廼拜偃爲郎中

### 諫擊匈奴書

魏相

宣帝元康中匈奴遣兵擊漢屯田車師者不能下上與後將軍趙充國等議欲以匈奴衰弱出兵擊其右地使不敢復擾西域相上書

臣聞之救亂誅暴謂之義兵兵義者王敵加於已不得已而起者謂之應兵兵應者勝爭恨小故不忍憤怒者謂之忿兵兵忿者敗利人土地貨寶者謂之貪兵兵貪者破恃國家之大矜民人之衆欲見威於敵

者謂之驕兵兵驕者滅此五者非但人事乃天道也  
間者匈奴嘗有善意所得漢民輒奉歸之未有犯於  
邊境雖爭屯田車師不足致意中今聞諸將軍欲興  
兵入其地臣愚不知此兵何名者也今邊郡困乏父  
子共犬羊之裘食草菜之實常恐不能自存難以動  
兵軍旅之後必有凶年言民以其愁苦之氣傷陰陽  
之和也出兵雖勝猶有後憂恐災害之變因此以生  
今郡國守相多不實選風俗尤薄水旱不時案今年  
計子弟殺父兄妻殺夫凡二百二十二人臣愚以謂  
此非小變也今左右不憂此乃欲發兵報纖介之忿

於遠夷殆孔子所謂吾恐季孫之憂不在顓臾而在蕭牆之內也願陛下與平昌侯樂昌侯平恩侯及有識者詳議乃可

上從相言而止

### 罷邊備議

侯應

漢元帝竟寧元年單于上書願保塞上谷以西至敦煌傳之無窮請罷邊備人言陛下有司議議皆以為便即中侯應習邊事以為不可許上言

周秦以來匈奴暴桀寇侵邊境漢興尤被其害臣聞北邊塞至遼東外有陰山東西千餘里草木茂盛多禽獸本冒頓單于依阻其中治作弓矢來出為寇是其苑囿也至孝武世出師征伐斥奪此地攘之於幕

北建塞徼起亭隧築外城設屯戍以守之然後邊境  
得用少安幕北地平少草木多大沙匈奴來寇少所  
蔽隱從塞以南徑深山谷往來差難邊長老言匈奴  
失陰山之後過之未嘗不哭也如罷備塞戍卒示夷  
狄之大利不可一也今聖德廣被天覆匈奴匈奴得  
蒙全活之恩稽首來臣夫夷狄之情困則卑順疆則  
驕逆天性然也前以罷外城省亭隧今裁足以候望  
通烽火而已古者安不忘危不可復罷二也中國有  
禮義之教刑罰之誅愚民猶尚犯禁又况單于能必  
其終不犯約哉三也自中國尚建關梁以制諸侯所

以絕臣下之覬覦也。設塞徼置屯戍，非獨爲匈奴而已，亦爲諸屬國降民本故匈奴之人，恐其思舊逃亡也。近西羌保塞，與漢人交通，吏民貪利，侵盜其畜產，妻子以此怨恨起而背畔，世世不絕。今罷塞，則生嫚易分爭之漸，五也。往者從軍，多沒不還者，子孫貧困。一旦亡出，從其親戚六也。又邊人奴婢愁苦，欲亡者多，日聞匈奴中樂無柰候望，惡何。然時有亡出塞者七也。盜賊桀黠羣輩犯法，如有窘迫亡走北出，則不可制入也。起塞以來百有餘年，非皆以上垣也。或因山巖石木柴，僵落谿谷水門稍稍平之，卒徒築



治功費久遠不可勝計臣恐議者不深慮其終始欲以一切省繇戍十年之外百歲之內卒有他變障塞破壞亭隧滅絕當更發屯繕治累世之功不可卒復九也如罷戍卒省候望單于自以保塞守禦必深德漢請求無已小失其意則不可測開夷狄之隙虧中國之固十也非所以永持至安威制百蠻之長策也

受伊邪莫演降議

谷永

漢成帝河平元年上

漢興匈奴數爲邊害故設金爵之賞以待降者今單于詘體稱臣列爲北藩遣使朝賀無有二心漢家接

之宜異於往時今既享單于聘貢之質而更受其逋  
逃之臣是貪一夫之得而失一國之心擁有罪之臣  
而絕慕義之君也假令單于初立欲委身中國未知  
利害私使伊邪莫演詐降以卜吉凶受之虧德沮善  
令單于自疏不親邊吏或者設爲反間欲因而生隙  
受之適合其策使得歸曲而直責此誠邊竟安危之  
原師旅動靜之首不可不詳也不如勿受以昭日月  
之信抑詐諛之謀懷附親之心便

論通康居

郭舜

漢成帝時上

本匈奴盛時非以兼有烏孫康居故也及其稱臣妾  
非以失二國也漢雖皆受其質子然三國內相輸遺  
交通如故亦相候伺見便則發合不能相親信離不  
能相臣役以今言之結配烏孫竟未有益反爲中國  
生事然烏孫旣結在前今與匈奴俱稱臣義不可距  
而康居驕黠訖不肯拜使者都護更至其國坐之烏  
孫諸使下王及貴人先飲食已乃飲啗都護更故爲  
無所省以夸旁國以此度之何故遣子入侍其欲賈  
市爲好辭之詐也匈奴百蠻大國今事漢甚備聞康  
居不拜且使單于有自下之意宜歸其侍子絕勿復

使以章漢家不通無禮之國敦煌酒泉二郡及南道  
入國給使者往來人馬驢橐駝食皆苦之空罷耗所  
過送迎驕黠絕遠之國非至計已

諫不受單于朝書

楊雄

漢哀帝建平四年上

臣聞六經之治貴於未亂兵家之勝貴於未戰二者  
皆微然而大事之本不可不察也今單于上書來朝  
國家不許而辭之臣愚以爲漢與匈奴從此隙矣匈  
奴本北地之狄五帝所不能臣三王所不能制其不  
可使隙甚明臣不敢遠稱請引秦以來明之以秦始

皇之疆蒙恬之威帶甲四十餘萬然不敢窺西河迺築長城以界之會漢初興以高祖之威靈三十萬衆困於平城士或七日不食時竒譎之士石畫之臣甚衆卒其所以脫者世莫得而言也又高皇后嘗忿匈奴羣臣庭議樊噲請以十萬衆橫行匈奴中季布曰噲可斬也妾阿順指於是大臣權書遺之然後匈奴之結解中國之憂平及孝文時匈奴侵暴北邊侯騎至雍甘泉京師大駭發三將軍屯細柳棘門霸上以備之數月迺罷孝武即位設馬邑之權欲誘匈奴使韓安國將三十萬衆徼於便墜匈奴覺之而去徒費

財勞師一虜不可得見况單于之面乎其後深惟社  
稷之計規恢萬載之策迺大興師數十萬使衛青霍  
去病操兵前後十餘年於是浮西河絕大幕破冥顏  
襲王庭窮極其地追奔逐北封狼居胥山禪於姑衍  
以臨瀚海虜名王貴人以百數自是之後匈奴震怖  
益求和親然而未肯稱臣也且夫前世豈樂傾無量  
之費役無罪之人快心於狼望之北哉以爲不一勞  
者不久佚不暫費者不永寧是以忍百萬之師以摧  
餓虎之喙運府庫之財填廬山之壑而不悔也至本  
始之初匈奴有桀心欲掠烏孫侵公主迺發五將之

師十五萬騎獵其南而長羅侯以烏孫五萬騎震其西皆至質而還時鮮有所獲徒奮揚威武明漢兵若風雷耳雖空行空反尚誅兩將軍故北狄不報中國未得高枕安寢也逮至元康神爵之間大化神明鴻恩博洽而匈奴內亂五單于爭立日逐呼韓邪攜國歸死扶伏稱臣然尚羈縻之計不顯制自此之後欲朝者不距不欲者不疆何者外國天性忿驚形容魁健負力怙氣難化以善易隸以惡其疆難出其和難得故未服之時勞師遠攻傾國殫貨伏尸流血破堅拔敵如彼之難也旣服之後慰薦撫循交接賂遺威

儀俯仰如此之備也往時嘗屠大宛之城蹈烏桓之  
壘探姑繒之壁藉蕩姐之場艾朝鮮之薊拔兩越之  
旗近不過旬月之役遠不離二時之勞固已挈其庭  
掃其閭郡縣而置之雲徹席卷後無餘蓄惟北狄爲  
不然真中國之堅敵也三番比之懸矣前世重之茲  
甚未易可輕也今單于歸義懷款誠之心欲離其庭  
陳見于前此廼上世之遺策神靈之所想望國家雖  
費不得已者也柰何距以來厭之辭䟽以無日之期  
消往昔之恩開將來之隙夫款而隙之使有恨心負  
前言緣往辭歸怨於漢因以自絕終無北面之心威



之不可論之不能焉得不爲大憂乎夫明者視於無  
形聰者聽於無聲誠先於未然即蒙恬樊噲不復施  
棘門細柳不復備馬邑之策安所設衛霍之功何得  
用五將之威安所震不然一有隙之後雖智者勞心  
於內辯者轂擊於外猶不若未然之時也且往者圖  
西域制車師置城都護三十六國費歲以大萬計者  
豈爲康居烏孫能踰白堆而寇西邊哉廼以制匈奴  
也夫百年勞之一日失之費十而愛一臣竊爲國不  
安也惟陛下少留意於未亂未戰以遏邊萌之禍

諫伐匈奴

嚴 尤

臣聞匈奴爲害所從來久矣未聞上世有必征之者也後世三家周秦漢征之然皆未有得上策者也周得中策漢得下策秦無策焉當周宣王時獫狁內侵至于涇陽命將征之盡境而還其視戎狄之侵譬如蠶蟲之螫毆之而已故天下稱明是爲中策漢武帝選將練兵約齎輕糧深入遠戍雖有克獲之功胡輒報之兵連禍結三十餘年中國罷耗匈奴亦創艾而天下稱武是爲下策秦始皇不忍小耻而輕民力築長城之固延袤萬里轉輸之行起於負海疆境旣完中國內竭以喪社稷是爲無策今天下遭陽九之厄

比年饑饉西北邊尤甚發三十萬衆具三百日糧東援海岱南取江淮然後乃備計其道里一年尚未集合兵先至者聚居暴露師老械弊勢不可用此一難也邊旣空虛不能奉軍糧內調郡國不相及屬此二難也計一人三百日食用糒十八斛非牛力不能勝牛又當自齋食加二十斛重矣胡地沙鹵多乏水草以往事揆之軍出未滿百日牛必物故且盡餘糧尚多人不能負此三難也胡地秋冬甚寒春夏甚風多齋糒餽薪炭重不可勝食糒飲水以歷四時師有疾疫之憂是故前世代胡不過百日非不欲久勢力不

能此四難也輜重自隨則輕銳者少不得疾行虜徐  
還進勢不能及幸而逢虜又累輜重如遇險阻衝危  
相隨虜要遮前後危殆不測此五難也大用民力功  
不可必立臣伏憂之今既發兵宜縱先至者令臣尤  
等深入霆擊且以創艾胡虜莽不聽尤言轉兵殺如  
故天下騷動

乞優答北單于疏

班彪

漢光武建武二十八年匈奴遣使詣闕貢裘  
馬乞和親并求音樂帝下三府議酬答之宜  
司徒掾班彪奏

臣聞孝宣皇帝勅邊守尉曰匈奴大國多變詐交接

得其情則却敵折衝應對入其數則反爲輕欺今北  
匈奴見南單于來附俱謀其國故數乞和親又遠驅  
牛馬與漢合市重遣名王多所貢獻斯皆外示富強  
以相欺誕也臣見其獻益重知其國益虛歸親愈數  
爲懼愈多然今旣未獲助南則亦不宜絕北羈縻之  
義禮無不答謂可頗加賞賜畧與所獻相當明加曉  
告以前世呼韓邪郅支行事報答之辭令必有適今  
立藁草并上曰單于不忘漢恩追念先祖舊約欲脩  
和親以輔身安國計議甚高爲單于嘉之往者匈奴  
數有乖亂呼韓邪郅支自相讎隙並蒙孝宣皇帝垂

恩救護故各遣侍子稱藩保塞其後郅支忿戾自絕  
皇澤而呼韓附親忠孝彌著及漢滅郅支遂保國傳  
嗣子孫相繼今南單于攜衆向南款塞歸命自以呼  
韓嫡長次第當立而侵奪失職猜疑相背數請兵將  
歸掃北庭策謀紛紜無所不至惟念斯言不可獨聽  
又以北單于比年貢獻欲脩和親故拒而未許將以  
成單于忠孝之義漢秉威信總率萬國日月所照皆  
爲臣妾殊俗百蠻義無親疎服順者褒賞畔逆者誅  
罰善惡之効呼韓郅支是也今單于欲脩和親款誠  
已達何嫌而欲率西域諸國俱來獻見西域國屬匈

奴與屬漢河異單于數連兵亂國內虛耗貢物裁以  
通禮何必獻馬裘今齊雜繒五百匹弓韃犢凡一矢  
發遣遺單于又賜獻馬左骨都候右谷蠡王雜繒各  
四百匹斬馬劍各一單于前言先帝時所賜呼韓邪  
竿瑟篳篥皆敗願復裁賜念單于國尚未安方厲武  
節以戰攻爲務竿瑟之用不如良弓利劍故未以齊  
朕不愛小物於單于便宜所欲遣驛以聞

帝悉納從

論北單于不當封王

袁安

漢和帝永元四年上

臣聞功有難圖不可豫見事有易斷較然不疑伏惟

光武皇帝本所以立南單于者欲安南定北之策也  
恩德甚備故匈奴遂分邊境無患孝明皇帝奉承先  
意不敢失隆赫然命將爰伐塞北至于章和之初降  
者十餘萬人議者欲置之濱塞東至遼東太尉宋山  
光祿勲耿秉皆以爲失南單于心不可先帝從之陛  
下奉承洪業大開疆宇大將軍遠師討伐席卷北庭  
此誠宣明祖宗崇立弘勲者也宜審其終以成厥初  
伏念南單于屯先父舉衆歸德自蒙恩以來四十餘  
年三帝積累以遺陛下陛下深宜遵述先志成就其  
業况屯首唱大謀空盡北虜輟而弗圖更立新降以



一朝之計違三世之規失信於所養建立於無功由秉實知舊議而欲背棄先恩夫言行君子之樞機賞罰理國之綱紀論語曰言忠信行篤敬雖蠻貊行焉今若失信於一屯則百蠻不敢復保誓矣又烏桓鮮卑新殺北單于凡人之情咸畏仇讐今立其弟則二虜懷怨兵食可廢信不可去且漢故事供給南單于費直歲一億九十餘萬西域歲七千四百八十萬今北庭彌遠其費過倍是乃空盡天下而非建策之要也

漢安帝延光二年北虜連興車師入寇河西  
朝廷不能禁議者因欲閉玉門陽關以絕其  
患敦煌大守張璠上書陳三策

北虜呼行王常展轉蒲類素海之間專制西域共爲  
寇鈔今以酒泉屬國吏士二千餘人集崑崙塞先擊  
呼衍王絕其根本因發鄯善兵五千人脅車師後部  
此上計也若不能出兵可置軍司馬將士五百人四  
郡供其犂牛穀食出據柳中此中計也如又不能則  
宜棄交河城收鄯善等悉使入塞此下計也

諫伐鮮卑議

蔡邕

漢靈帝熹平六年護羌校尉田晏坐事被原  
欲立功自効帝因中常侍王甫言拜晏破鮮

甲中郎將大臣多有不同召百官議朝堂議  
則蔡邕議

書戒猾夏湯伐鬼方周有獫狁蠻荆之師漢有閭顏  
瀚海之事征討殊類所由尚矣然而時有同異勢有  
可否故謀有得失事有成敗不可齊也武帝情存遠  
略志闢四方南誅百越北討強胡西伐大宛東并朝  
鮮因文景之蓄藉天下之饒數十年間官民俱匱至  
乃興鹽鐵酒榷之利設告緡重稅之令民不堪命起  
爲盜賊關東紛擾道路不通繡衣直指之使奮鉞威  
而並出旣而覺悟乃息兵罷役丞相爲富民侯故主  
父偃曰夫務戰勝窮武事未有不悔者也夫以世宗

武將帥良猛財賦充實所拓廣遠猶有悔焉況今  
人財並乏事劣昔時乎自匈奴遁逃鮮卑強盛據其  
故地稱兵十萬才力勁健益智益生加以關塞不嚴  
禁網多漏精金良鐵皆爲賊有漢人逋逃爲之謀主  
兵利馬疾過於匈奴昔段熲良將習兵善戰有事西  
羌猶十餘年今育晏才策未必過熲鮮卑種衆不弱  
于曩時而虛計二載自許有成若禍結兵連豈得中  
休當復徵發衆人轉運無已足爲耗竭諸夏并力蠻  
夷夫邊番之患手足之蚡搔中國之困胷背之癰疽  
方今郡縣盜賊尚不能禁况此醜虜而可伏乎昔高

祖忍平城之耻吕后棄慢書之詎方之於今何者爲甚天設山河秦築長城漢起塞垣所以別內外異殊俗也苟無賊國內侮之患則可矣豈與蟲蠹狡寇計爭往來哉雖或破之豈可殄盡而方今本朝爲之旰食乎夫專勝者未必克挾疑者未必敗衆所謂危聖人不任朝議有嫌明主不行也昔淮南王安諫伐越曰天子之兵有征無戰言其莫敢校也如使越人蒙死以逆執事廝輿之卒有一不備而歸者雖得越王之首而猶爲大漢羞之而欲以齊民易醜虜皇威辱外夷就如其言猶已危矣况乎得失不可量邪昔珠

崖郡反孝元皇帝納賈捐之言而下詔曰珠崖背畔  
今議者或曰可討或曰棄之朕日夜惟思羞威不行  
則欲誅之通于時變復憂萬民夫萬民之饑與遠蠻  
之不討何者爲大宗廟之祭凶年猶有不備况避不  
嫌之辱哉今關東大困無以相贍又當動兵非但勞  
民而已其罷珠崖郡此元帝所以發德音也夫卹民  
救急雖成郡列縣尚猶棄之况障塞之外未嘗爲民  
居者乎守邊之術李牧善其略保塞之論嚴尤申其  
要遺業猶在文章具存循二子之策守先帝之規臣  
曰可矣

帝不從

安邊論

何承天

宋文帝時御史中丞何承天上安邊論陳四事

伏見北蕃上事虜犯青兗天慈降監矜此黎元博建  
群策經綸戎政臣以愚陋預聞訪及率其管窺謹撰  
安邊論庶或開引群慮延盡衆謀短長畢陳當否可  
見其論曰寇雖習戰來久又全據燕趙跨帶秦魏山  
河之險終古如一自非大田淮泗內實青徐使民有  
贏儲野有積穀然後分命方召總率虎旅精卒十萬  
使一舉盪夷則不足稍勤王師以勞天下何以言之  
今遺黎習亂志在偷安非皆耻爲左袵遠慕寇冕徒

以殘害剝辱視息無寄故繯負歸國先後相尋虜旣不能校勝循理攻城畧地而輕兵掩襲急在驅蹙是所以速怨召禍滅亡之日今若遣軍追討報其侵暴大翦幽冀屠城破邑則聖朝愛育黎元方濟之以道若但欲撫其歸附伐臯弔民則彼必輕騎奔走不肯會戰徒興巨費無損於彼復竒兵深入殺敵破軍苟陵患未盡則困獸思鬪報復之役將遂無已斯秦漢之末策輪臺之所悔也安邊固守於計爲長曹孫之霸才均智敵江淮之間所居各數百里魏舍合肥退保新城江陵移民南渰濡湏之戍家停羨溪及表陵



之屯民夷散雜晉宣王以爲宜從江南以北岸曹爽不許果亡祖中此皆前代之殷鑒也何者斥候之郊非畜牧之地非耕桑之邑故堅壁清野以俟其來整甲繕兵以乘其敝雖時有古今勢有彊弱保民全境不出此塗要而歸之有四一曰移遠就近以實內地今青兗舊民冀州新附在界首者三萬家此寇之資也今悉可內徙青州民移東萊平昌北海諸郡大山以南南至下邳左沐右沂田良野沃西阻蘭陵北阨大峴四塞之內其號險固民性重遷闔於圖始無虜之時喜生咨怨今新被鈔掠餘懼未息若曉示安危

居以樂土宜其歌忭就路視遷如歸二日浚復城隍  
以增阻防舊秋冬收歛民人入保所以警備暴客使  
防衛有素也古之城池處處皆有今雖傾圮猶可脩  
治粗計戶數量其所容新徙之家悉著城內假其經  
用爲之間伍納稼築場還在一處婦子守家長吏爲  
師丁夫匹婦春夏佃牧寇至之時一城千室堪戰之  
士不下二千其餘羸弱猶能登陴鼓譟十則國之兵  
家舊說戰士二千足抗群虜三萬矣三曰纂偶車牛  
以飾戎械計千家之資不下五百偶牛爲車五百兩  
參合鈎連以衛其衆設使城不可固平行趨險賊所

不能干既已族居易可檢括號令先明民知風戒有  
急徵發信宿可聚四曰計丁課仗勿使有闕千家之  
邑戰士二千隨其便能各自有仗素所服習銘刻由  
已還保輸之於庫出行請以自衛弓幹利鐵民不辦  
得者官以漸充之數年之內軍用粗備矣臣聞軍國  
異容施於封畿之內兵農並脩在於疆場之表攻守  
之宜皆由其習任其怯勇山陵川陸之形寒暑溫涼  
之氣各由本性易則害生是故戍申作師遠屯清濟  
功費旣重嗟怨亦深以臣料之未若即用彼衆之易  
也管子治齊寄令在民商君爲秦設以耕戰終申威

定霸行其志業非苟任強實由有數梁用走卒其邦  
自滅齊用技擊厭衆亦離漢魏以來茲制漸絕蒐田  
非復先王之禮治兵徒逞耳目之欲有急之日民不  
知戰至乃廣延賞募奉以厚秩發遽奔救天下騷然  
方伯刺史拱手坐聽自無經畧唯望朝廷遣軍此皆  
忘戰之害不教之失也今移民實內浚治城隍族居  
聚處課其騎射長吏簡試差品能否甲科上第漸就  
優別明其勲才表言州郡如此則屯部有常不遷其  
業內護老弱外通官途朋曹素定同憂等樂情由習  
親藝因事著晝戰見貌足相識夜闌聞聲足相救斯

教戰之一隅先哲之遺術論者必以古城荒毀難可  
脩復今不謂頓便加功整麗如舊但欲先定民營其  
閭術墉壑存者因而即之其有毀缺權時柵斷足以  
禦彼輕兵防遏游騎假以方將漸就只立車牛之賦  
課仗之宜攻守所資軍國之要今因民所利導而率  
之耕農之器爲府庫之寶田蠶之氓兼扞城之用千  
家總倍旅之兵萬戶具全軍之衆兵強而敵不戒國  
富而民不勞比於優復隊伍坐食廩糧者不可同年  
而校矣今承平來久邊令弛縱弓箠利鐵旣不都斷  
往歲棄甲垂二十年課其所住理應消壞謂宜申明

舊制延加禁塞諸商賈往來幢隊挾藏者皆以軍法治之又界上嚴立闕候杜廢間蹊城保之境諸所課仗並加雕鐫別造程式若有遺鏃亡刃及私爲竊盜者皆可立驗於事爲長又鉅野湖澤廣大南通洙泗北連青齊有舊縣城正在澤內宜立式修復舊堵利其埭遏給輕艦百艘寇若入境引艦出戰左右隨宜應接據其師津毀其航漕此以利制車運我所長亦微徹敵之要也

### 論處降胡

王 駿

唐玄宗開元三年突厥默啜爲拔曳國所殺其下多降旣而稍稍叛去原州都督王峻上

突厥向以國亂故款塞與部落無間延係北風何嘗  
忘之今徙處河曲使內伺邊鐔久必爲患比者不受  
要約兵已屢動擅作蜂區閉障行李虜脫南牧降帳  
必與連衡以相應接表裏有敵雖彭韓孫吳無所就  
功請至農隙令朔方軍大陳兵召酋豪告以禍福啗  
以金縢且言南方麋鹿魚米之饒並遷置淮右河南  
寬鄉給之程糧雖一時之勞然不二十年漸服諸華  
料以充兵則皆勁卒議者若謂降敵不可以南處則  
高麗舊俘置沙漠之西城傍編夷居青徐之右何獨  
胡不可徙歟臣復料議者必曰故事置於河曲前

至今無異且往者頡利破亡邊鄙安定故降  
人得以久安今虜未殄滅此降人皆戚屬固不與往  
來臣請以三策料之悉其部落置內地獲精兵  
之資閉黠虜之患此上策也亭障之下蕃華參處廣  
遠戍爲備擬費甚人勞下策也置之朔塞滋成禍萌  
此無策也不然前至河冰且必有變

書未報而虜已叛

### 論契丹

宋 琪

宋太宗端拱間吏部尚書宋琪上

國家將平燕薊臣敢陳十策一契丹種族二料賊衆  
寡三賊來布置四備邊五命將六排陣討伐七和蕃



八饋運九收幽州十滅契丹契丹蕃部之別種代居遼澤中南界潢水西距邢山疆土幅員千里而近其主自阿保機始彊盛今幼主保機曾孫也晉末契丹主頭下兵謂之大帳有皮室兵約三萬皆精甲也爲其爪牙國母阿保機妻述律氏頭下謂之屬珊屬珊有衆二萬乃阿保機之牙將當是時半已老矣南來時量分借得三五千騎述律常留餘兵爲部族根本其諸大首領大者千餘騎次者數百騎皆私甲也別族則有奚雪勝兵亦萬餘人少馬多步又有渤海首領步騎萬餘人並髡髮左衽竊爲契丹之飾復有近

界室韋女真党項亦被脅屬每部不過千餘騎其三  
部落吐渾沙陀洎幽州管内鴈門以北十餘州軍部  
落漢兵合二萬餘衆此是石晉割以賂蕃之地也蕃  
部諸族其數可見矣每蕃部南侵其衆不啻十萬契  
丹入界之時步騎車帳不從阡陌東西一槩而行大  
帳前及東西面差大首領三人各率萬騎支散遊奕  
百十里外亦交相偵邏謂之欄子馬契丹主吹角爲  
號衆即頓舍環遶穹廬以近及遠折木梢屈之爲弓  
子鋪不設槍營塹柵之備每軍行聽鼓三伐不間昏  
晝一匝便行未逢大敵不乘戰馬俟近我師即競乘

之所以新羈戰蹄有餘力也且用軍之術成列而不戰俟退而乘之多伏兵斷糧道冒夜舉火土風曳柴饋餉自齊退敗無耻散而復聚寒而益堅此其所長也中原所長秋夏霖霪天時也山林河津地利也槍突劍弩兵勝也財豐士衆力强也乘時互用較然可知王師備邊破敵之計每秋冬時河朔州軍緣邊砦柵但專守境勿輒侵漁令彼尋戈其詞無措或戎馬旣肥長驅入寇契丹主行部落萃至寒雲翳日朔雪迷空鞍馬相持擅褐之利所宜守陴坐甲以逸待勞令騎士並屯於天雄軍具磁相州以來若分在邊城

緩急難於會合近邊州府只用步兵多屯營手人者  
萬卒小者千人堅壁固守勿令出戰彼以全國之兵  
此以一郡之衆雖勇懦之有殊慮衆寡之不敵也國  
家必命大將總統前軍以遏侵軼只於天雄軍邢洛  
貝州以來設犄角之備俟其陽春啟候虜計既窮新  
草未生陳芟已朽蕃馬無力疲寇思歸逼而逐之必  
自奔北前軍行陣之法馬步精卒不過十萬追戎之  
陣須列前後其前陣萬五千騎陣身萬人是四十指  
揮左右哨各十指揮每指揮作一隊每隊用馬突或  
及子槍一百餘并弓劍骨朵其陣身解鎧排之俟與

戎相搏之時無問厚薄十分作氣槍突交衝馳逐往來後陣更進彼若乘我深入陣身之後更有馬步五千分爲十頭以撞竿鎧弩俱進爲回騎之舍陣哨不可輕動蓋防橫騎奔衝此陣以都監主之進退賞罰便可裁決後陣以馬步軍八萬招討董之與前陣不得過三五里展梢實心布常山之勢左右排陣分押之或前陣擊破寇兵後陣亦禁其馳驟輕進蓋師正之律也牧誓云四伐五伐乃止齊焉慎重之戒也是以開運中晉軍擄戎未嘗放散三四年間雖虜酋爲戎首多計桀黠而無勝晉軍之處蓋併力禦之厥後

以任人不當爲張彥澤之所誤如將來殺獲驅攘之後聖人務好生之德設息兵之謀雖降志難甘亦和我爲便魏絳嘗陳五利奉春僅得中策兵馬凶器聖人不得已而用之若精選使臣不辱君命通盟繼好弭戰息民此亦策之得也臣每見國朝發兵未至屯戍之所已於兩河諸郡調民運糧遠近騷然煩費十倍臣生居邊土習知其事况幽州爲國北門押蕃重鎮養兵數萬應敵乃其常事每逢調發惟作糗糧之備入蕃浹旬軍糧自齎每人給麪斗餘盛之於囊以自隨征馬每匹給生穀二斗作口袋飼秣日以二升

爲限旬月之間人馬俱無饑色更以牙官子弟戮力  
津擎裹送則一月之糧不煩饋運俟大軍旣至定議  
取舍然後圖轉饟亦未爲晚臣去年有平燕之策入  
燕之路具在此奏願加省覽

疏奏願採用之

### 議澶淵事宜

寇 準

真宗景德元年兵部侍郎同平章事寇準上

臣伏奉聖旨擘畫河北邊事及將來駕起與不起如  
起當至何處者一臣伏覩邊奏犬戎游騎已至深州  
以來竊緣三路大軍見在定州魏能張凝楊延昭田  
敏等又在威虜軍等處東路深趙貝冀滄德等州別

無大軍駐泊必慮虜騎近東南下寨輕騎打劫不唯  
老小驚騷兼便賊盜團聚直至天雄軍以來人戶驚  
移若不早張軍勢必恐轉啟戎心臣欲乞先那起天  
雄軍兵馬一萬人住貝州駐泊令周瑩杜彥鈞孫全  
照部轄若是虜騎在近即仰近城覓便掩殺兼令間  
道將文字與石普閻承翰照會掩殺蕃賊及召募強  
壯入賊界燒蕩鄉村劫殺人口仍乞照管南北道路  
多差人探報蕃賊次第聞奏及報天雄軍一則貴安  
人心二則張得軍勢以疑敵人之謀三則石普閻承  
翰等聞王師北來壯得軍威四則與邢洛地里不遠



張得犄角之勢一隨駕兵士衛扈宸居固不可與犬  
戎交鋒原野以爭勝負天雄軍至貝州兵馬車駕未  
起以前不過三萬人萬一犬戎至貝州已南下寨游  
騎漸更南來即湏那起定州兵馬三萬人騎令呼延  
贊等結陣南來鎮州及令河東雷有終手下兵士出  
土門路與定州兵馬會合相度事勢緊慢那至洛州  
以來方可聖駕順動假萬乘之天聲合數路之兵勢  
更令王超等在近城排布照應魏能張凝楊延昭田  
敏等處兵馬令作會合次第及前來累降指揮牽拽  
候抽移得定州河東兵馬附近始得幸大名一或恐

萬一定州兵馬被大戎於鎮定間下寨抽那不起邢  
洛之北許騎侵掠天雄軍東北縣分老小大段驚移  
須是分定州三路精兵差在彼將師等會合及令魏  
能張凝楊延昭田敏等兵馬漸那向東傍城下寨牽  
拽如此則大戎必有後顧之患亦不敢輕議引軍深  
入若是車駕不起轉恐蕃賊殘害生靈或是鑾輅親  
征亦須過大河即且幸澶淵就近易爲會合兵馬兼  
控扼津梁右臣叨列宰司素無竒略即承清問合聲  
鄙誠伏覩皇帝陛下睿智淵深聖猷宏遠固已坐籌  
而決勝尚猶虛已以詢謀兼彼大戎頗乏糧糗唯恃

腥羶之衆必懷首尾之憂豈敢不顧大軍但圖深入  
然亦慮其凶狡湏至過有防虞煩瀆天聰伏增戰懼  
荅詔論邊事

錢若水

真宗咸平三年工部侍郎集賢學士錢若水  
荅詔論邊事奏

臣官忝貳卿曾叨大用國家得失臣合先言但以仲  
夏朝廷舉兵以來秋末大戎鈔邊之後凡有機事臣  
莫得聞是以不敢上言恐成狂瞽今陛下躬擐甲胄  
蒙犯霜雪駐蹕大名已踰旬浹一日徧詢輿論明發  
德音大率不過即今禦戎之策將來安邊之術耳惟  
茲二事試爲陛下言之臣聞孫武著書以伐謀爲上

漢高將將以用法爲先伐謀者何蓋將帥料敵制勝  
也用法者何蓋朝廷能賞罰不私也今傳潛領數萬  
雄師閉門不出坐看戎虜俘掠生民上則孤陛下委  
注之恩下則挫陛下銳師之氣此蓋傳潛不能制勝  
朝廷未能用法使然也軍法臨陣不用命者斬若陛  
下明申重法斬潛以徇然後擢如楊延昭楊嗣若五  
七人增其爵秩分授兵柄使各將萬人問以強弩令  
分路討除孰敢不用命哉大戎聞我將帥不用命退  
則有死豈不懼惻豈獨思道邪亦來歲不敢犯邊矣  
如此則不出半月可以坐清邊塞然後鑾輅還京陛

下威聲振四海矣臣嘗讀五代史見周世宗即位之始劉崇結大戎遣大將楊衮領騎數萬隨崇至高平當時懦將樊愛能何徽等臨敵不戰世宗知之翌日大陳宴會斬愛能徽等拔偏將十餘人令分兵擊太原劉崇聞之股慄不敢出大戎即日而遁是以兵威大振爾後收淮南下秦鳳平關南如席卷耳以陛下睿聖神武豈愧於周世宗乎此所謂即今禦戎之策也其將來安邊之術臣不敢廣引前事慮煩聖聰止以近事言之太祖朝制最得其宜止以郭進在邢州李漢超在關南何繼筠在鎮定賀惟忠在易州李謙

溥在隰州姚內斌在慶州董遵誨在通遠軍王彥昇  
在原州然但得沿邊巡檢之名不授行營部管之號  
皆十餘年不易其任立功者厚加賞賚其位皆不至  
觀察使位不高則朝廷易制久不易則邊事盡知然  
後授以聖謀不令生事來則掩殺去則勿追所以十  
七年中北戎西蕃不敢犯塞以至屢遣戎使先來乞  
和此皆布在耳目陛下之所知也伏望遵太祖之故  
事察下臣之愚衷精擇名臣分理邊場罷部管之號  
使其不相統臨置巡檢之名俾其迺相救應如此則  
出必擊寇入則守城不數年間可致邊烽罷警矣

論備禦西北二虜七事

韓琦

宋仁宗時上

臣聞漢文帝襲高惠承平之後躬行節儉國治民富刑措不用時賈誼上書言事尚以爲可慟哭太息豈其過哉蓋憂深思遠圖長久之計欲大漢之業垂千萬世而無窮者今陛下紹三聖之休烈仁德遠被天下大定民樂其生者八十餘載矣而臣竊觀時事謂可晝夜泣血非直慟哭太息者何哉蓋以西北二虜禍釁已成而上下泰然不知朝廷之將危宗社之未安也臣今不暇廣有援引請粗陳其大槩切以契丹

宅大漠跨遼東據全燕數十郡之雄東服高麗西臣  
元昊自五代迄今垂百餘年與中原抗衡日益昌熾  
至於典章文物飲食服玩之盛盡習漢風故虜氣愈  
驕自以爲昔時元魏之不若也非如漢之匈奴唐之  
突厥本以夷狄自處與中國好尚之異也近者復幸  
朝廷西方用兵違約遣使求關南之地以啟爭端朝  
廷愛念生民爲之隱忍歲益金幣之數且固前盟而  
尚邀獻納之名以自尊大其輕視中國情可見矣又  
元昊父祖以來畜養姦謀招納亡命雖外示臣節而  
內全兵力至元昊則好亂逞志併甘涼諸蕃以拓境



土自度種落強盛故僭號背恩北連契丹欲成鼎峙之勢非如繼遷昔年跳梁於銀夏之間爾元昊累歲盜邊官軍屢衄今來定川全勝之氣遣人約和則知其計愈深而其事可虞也議者謂昨假契丹傳道之力必事無不合豈不思契丹既能使元昊罷兵豈不能使元昊舉兵乎比來辭禮驕慢殊未屈下北虜之言旣已無驗亦恐有合從之策以困中原朝廷若軫西民之勞暫未休養元元且以金帛啗之待以不臣之禮臣恐契丹聞之謂朝廷事力已屈則又遣使移書過邀尊大之稱或求朝廷不可從之事墮其誓約

然後駢犬羊之衆直趨大河復使元昊舉兵深寇關  
輔當是時未審朝廷以何術而禦之或西鄙稱藩專  
事北寇陛下親御六師臨澶淵以待之即未知今之  
將卒事力與環衛統帥比真宗北征時何如欲駐蹕  
北京以張軍勢臣恐虜衆由德博渡河直趨京師則  
朝廷根本之地宗廟宮寢府庫倉廩百官六軍室家  
所在而一無城守之略陛下可擁北京之衆却行而  
救之乎臣所以謂可晝夜泣血者誠憂及於此冀陛  
下一悟而急爲拯救也朝廷若謂今之盟約尚可固  
結則前三十年之信誓朝廷何負二虜而一旦違之

哉彼狼狽之心見利而動又可推誠以待之乎夫得  
於先見預爲之防則功逸而事集若變生倉卒駭而  
圖之雖使良平復生爲陛下計亦不能及矣臣是以  
夙夕思之朝廷若不大新紀律則必不能革時弊而  
弭大患臣輒畫當今所宜先行者七事條列以獻其  
大略一曰清政本樞密院本兵之地今所主多苛碎  
眇末之務中書樞密院事有例者著爲法可擬進者  
無面奏其餘微瑣可悉歸有司使得從容謀議賜對  
之際專論大事二曰念邊事今政府循故事纔午即  
出欲稍留則恐礙衆退朝食罷忽遽簽書而去何暇

及疆事哉謂宜湏未正方出延此一時以專邊論三  
曰擢才賢自承平以來用人以叙遷之法故遺才甚  
多近中書樞密院求一武臣代郭承祐聚議累日不  
能得謂宜倣祖宗舊例於武臣中不次超擢以試其  
能四曰備河北自北虜通好三十餘年武備悉廢慢  
書之至騷然莫知所爲宜選轉運使二員密授經略  
責以歲月使營守禦之備則我待之有素也五曰固  
河東前歲昊賊陷豐州掠河外屬戶殆盡麟府勢孤  
絕宜責本道帥度險要建城堡省轉餉爲持久之計  
六曰收民心祖宗置內藏庫蓋備水旱兵革之用非

私畜財而充已欲也自用兵以來財用匱竭宜稍出金帛以佐邊用民力可寬而衆心安矣七曰營洛邑今帝都無城隍之固以備非常議興葺則爲張皇勞民不若陰葺洛都以爲游幸之所歲運太倉羨餘之粟以實其廩庾則皇居壯矣

論契丹不寇河東

富弼

仁宗慶曆四年樞密副使富弼上

臣昨日垂拱奏事准宣諭今來虜主雲州受禮恐於河東作過今兩府設備實由臣誤荷獎擢無所施設致此外寇上煩聖憂聞命震驚不遑啓處然退自思

念僅得粗略切謂契丹必不寇河東其事有九無名  
一也動稱王師不肯竊發二也河北平坦可以長驅  
必不由河東險阻而來易入而難出三也河北富實  
河南虛乏必不肯擊虛乏而令我備富實之地四也  
河北無備河東有備黠虜萌南下之心久矣臨事必  
不肯捨無備而寇有備五也若欲乘我不測而入當  
行詭道出於倉卒必不肯先報雲州受禮六也契丹  
始與元昊相約以困中國前年契丹背約與中國復  
和元昊怒契丹坐受中國所益之幣因此有隙屢有  
怨辭契丹恐其侵軼於是壓元昊境築威塞州以備

之而保族累殺威塞役兵契丹又疑元昊使來遂舉  
兵西伐驗之非詐今必無會合入寇之理七也契丹  
惜燕地如人惜心腹若寇河東豈不防我攻燕爲牽  
制之術于今不聞備燕八也契丹自得燕薊不復由  
河東入寇九也臣驗此九事故知契丹不寇河東必  
矣臣今但論目下不爲河東之患過此以往則非臣  
所知臣謂契丹異日之禍必由河朔河東只可爲牽  
制之地所以臣近奏河北守禦之策因乞守一要郡  
自行其事下二府議之未合只且令田況往彼按臣  
所說此乃平時悠悠所爲非今來確乎至急之意也

河朔二三年來雖名爲設備其實未堪禦寇乃是張  
豫備之虛聲適足重敵人之姦計爲患愈大不可不  
思臣前歲奉使契丹理當無所增賂蓋爲朝廷方盡  
力西郡未遑北事於是忍羞自屈歲益所入聊以款  
兵緩禍而望雪耻於後也臣今欲乞必願俞允不住  
訓兵備敵以安元元至於身羞國耻庶幾可刷臣不  
勝大幸

論西鄙議和先防北虜

歐陽脩

仁宗慶曆三年知諫院歐陽脩上

臣伏見朝廷方遣使與西賊議通和之約近日竊聞



邊臣頻得北界文字來問西夏約和了與未了苟實  
如此事深可憂臣以謂天下之患不在西戎而在北  
虜縱使無此文字終須貽患朝廷契丹通好僅四十  
年無有纖介之隙而輒萌姦計安有請求竊以戎狄  
貪憚性同犬彘遇強則伏見弱便欺見我無謀動皆  
屈就謂我爲弱知我可欺故添以金繒未滿其志更  
邀名分抑使必從無事而尚來猶如此若更因西事  
攬以爲功別有過求將何塞請此天下之人無愚與  
智共爲朝廷寒心者也今若果有文字來督通和之  
事則臣謂醜虜狂計其迹已萌不和則詰我違言旣

和則論功責報不出年歲恐湏動作苟難曲就必至  
交兵至於選將練師旣難卒辦禦戎制勝當在機先  
臣竊怪在朝之臣尚偷安靜自河以北絕無處置因  
循弛慢誰復挂心豈可待虜使在廷寇兵壓境然後  
計無所出空務張皇而已哉今國家必謂兩意雖垂  
尚牽盟誓邊防處置未敢張皇以臣思之莫若精選  
材臣付與邊郡使其各圖禦備密務脩完此最爲得  
也况今邊防處置百事垂方惟有擇人最爲首務今  
北邊要害州軍不過十有餘處於文武臣僚中選十  
餘人不爲難得各以一州付之使其各得便宜如理

家事完城壘訓兵戎習山川蓄糧食凡百自辦不煩  
朝廷經度以茲預備尚可枝梧至如鎮定一路最爲  
要害張存昔在延州以不了事罷去今乃委以鎮府  
王克基凡庸輕巧非將臣之材而任定州其餘州郡  
多匪其人臣欲乞陛下特詔兩府大臣取見在邊郡  
守臣可以禦敵捍城訓兵待戰者留之其餘中常之  
材不堪邊任者悉行換易若秋風漸勁虜獍有端陛  
下試思邊鄙之臣誰堪力戰朝廷之將誰可出師當  
臣初授諫職之時見朝廷進退大臣陛下銳意求治  
必謂群臣自此震懾百事自此脩舉西北二事最爲

大者自當處置不待人言及就職以來已數十日而政令之出漸循舊弊惟言事之臣拾遺補闕者勉強施行其一二至如講大利害正大紀綱外制四夷內紓百姓凡廟堂帷幄之謀未有一事施行於外者臣忝司諫諍豈敢不言伏望陛下不忘社稷之深耻無使夷狄之交侵駿發天威督勵臣下仍乞詢問兩府大臣西鄙和與不和能保契丹別無辭說否苟有所說能以廟謀奇筭沮止之否苟無謀以止之則練兵選將備邊待寇賊至而後圖能不敗事否臣願陛下勿謂去歲六符之來可以賄解今而有請則事難從

矣勿謂累年西賊爲患習以爲常若此事一動則天下搖矣臣所言者社稷之大計也願陛下留意而行之

先是四月朝廷遣邵良佐使夏州喻以所齎來文  
字名疆未正即令齎回其稱男雖見恭順然父子  
亦無不稱臣之禮自今上表只稱臣名朝廷當行封  
冊爲夏國主賜詔不名仍許置推場於保安軍歲賜  
絹十萬疋茶三萬斤命良佐與鄭等同行議定以聞  
七月元昊復遣呂休如定幸搶索黎罔壞與良佐俱  
來與要請凡十一事其欲稱男而不爲臣尤執前議

### 乞戒邊城闊畧細故

司馬光

英宗治平元年天章閣待制知諫院司馬光

臣聞明主謀事於始而慮終於微是以用力不勞而收功甚大切見國家所以禦戎狄之道似未盡其宜

當其安靖附順之時則好與之計校末節爭競細故  
及其桀傲暴橫之後則又從而姑息不能深討是使  
戎狄益有輕中國之心皆厭於柔服而樂爲背叛近  
者西戎之禍生於高宣北狄之隙起於趙滋而朝廷  
至今終未省悟尤以二人所爲爲是而以脩理守分  
者爲非是以邊鄙武臣皆銳意而生事或以開展荒  
弃之地十數里爲功勞或以殺略老弱之虜三五人  
爲勇敢朝廷稱其才能驟加擢用旣而虜心忿恨遂  
來報復屠剪熟戶鈔刼邊民所喪失者動以千計而  
朝廷但知驚駭增兵聚糧其致寇之人旣不追究而

守邊之臣亦無譴責如此而望夷秋賓伏疆場無虞  
是猶添薪扇火而來湯之不沸也臣愚切爲真宗皇  
帝親與契丹約爲兄弟仁宗皇帝赦趙元昊背叛之  
罪冊爲國主歲捐百萬之財分遺二虜豈樂此而爲  
之哉誠以屈已之愧小愛民之仁太故也今陛下嗣  
已成之業守已安之基而執事之臣數以爭桑之忿  
心不畏灌瓜之大計使邊鄙之患紛紛不息切爲陛  
下惜之近者聞契丹之民有於界河捕魚及於白溝  
之南剪伐柳栽者此乃邊鄙小事何足介意而朝廷  
以前知雄州李中祐不能禁禦爲不才別選州將以

代之臣恐新將之至必以中祐爲戒而以趙滋爲法  
妄殺虜民戰鬪之端往來無窮焉況今民力凋弊倉  
庫虛竭將帥乏人士卒不練夏國既有忿怨屢來侵  
寇禍胎已成若又加以契丹失權臣恐國力未易支  
也伏望陛下嚴戒北邊將吏若契丹不循常例小小  
相侵如魚船柳栽之類止可以文牒整會道理曉諭  
使官司自行禁約不可輕以矢刃相加若再三曉諭  
不聽則聞於朝廷雖專遣使臣至其王廷與之辯論  
曲直亦無傷也若又不聽則莫若博求賢才增脩德  
政俟公私富足士馬精強然後奉辭以討之可以驅



穹廬於漠北復唐漢之土宇與其爭漁柳之勝負不亦遠哉

### 諫西師防北虜

富弼

神宗熙寧三年武寧軍節度使檢校少師左僕射判亳州富弼上

不勢  
莫如此

臣竊知陝西用武諸路入討至今已足數月調發輸歛不無勞費陛下躬親萬務勤於訪逮臣所恨未能一効死力少寬陛下西顧之憂且念靈夏數州自太宗割賜之後幾百年所存者唯是空壘而已今所得城壁切恐未償所費既已克下又須守禦自此勞費卒無已時伏緣西夏與北虜常為犄角之勢蓋北虜

山前後十八州每恐朝廷有復取之意慶曆初因元  
昊叛仁宗不免討伐而北虜遂有嫚書興割地之隙  
其書大意自謂我與西夏是甥舅之國南朝不合加  
兵臣不能盡記其辭惟記一句云殊無忌器之嫌此  
大可見其意也臣其時兩使虜廷每見元昊遣人在  
彼密令詢問云來借兵此皆臣始末親經目覩不是  
剽聞以昔校今不敢謂必無此事今北虜亦須疑朝  
廷旣平西夏即移兵北伐必有借助西夏之謀不可  
不過慮及此也設或二虜相應兩邊起事即國用人  
力如何枝梧其間軍情民心須常加防察不可使至

于此極也况今天威已振王師已捷或且令退脩邊  
備講守禦之策更俟表裏安集別圖後舉以爲萬全  
之計亦爲未晚伏乞陛下特賜詳擇而審處之先是八月  
夏人侵順安綏平綏德黑木等寨延州郭達擊却之  
王申又舉國入寇攻圍大順城環慶路都監高  
萬人戰敗關右大震九月參知政事韓絳出宣撫陝  
西呂大防爲判州事自是西鄙用兵數年乃息



### 荅詔問北邊事宜

韓琦

神宗熙寧八年以侍中判相州韓琦上

臣伏蒙聖慈特差入內內侍省東頭供奉官幹當內  
東門司襄昱齎賜臣手詔以朝廷通好北虜八十年  
近歲以來生事彌甚代北之地素有定封而輒開釁

端妄來訴理比敕官吏同加按行雖圖籍甚明而詭辭不伏今橫使復至意在必得朕以祖宗盟好之重固將優容虜情無厭勢恐未已萬一不測何以待之古人大政必詢故老卿夙懷忠義歷相三朝雖尔身在外乃心罔不在王室其所以待禦之要禦備之方密具以聞臣晚年多病心力耗殫目欲再乞殘骸保此頽暮不意陛下以北虜生事深思預防記及孤愚曲有詢逮敢不勉竭以塞聖問臣切以契丹與中國抗者蓋一百七十餘年矣自石晉割地并有漢疆外兼諸戎益自驕大在祖宗朝屢嘗南牧極肆凶暴當

是時豈不欲悉天下之力必與虜角哉終以愛惜生靈屈就和好疆場有所興作深以張皇引惹爲戒以是七十年間二邊之民各安生業至於老死不知兵革戰鬪之事至仁大惠不可加也臣觀近年以來朝廷舉事則似不以大敵爲恤虜人素以久強之勢於我未嘗少下一旦見形生疑必謂我有圖復燕南之意雖虜主孱而佞佛豈無強梁宗屬與夫謀臣策士引先發制人之說迨此釁端故屢遣使以爭理地界爲名觀我應之之實如何耳所以致虜之疑者臣試陳其大畧高麗臣屬契丹於朝廷久絕朝貢向浙

與丹邦  
此安能  
使西賊  
順寒凌  
耳

路遣人招諭而來且高麗小邦豈能當契丹之盛來  
與不來國家無所損益而契丹知之謂朝廷將以圖  
我此契丹之疑也秦州古渭之西吐蕃部族散居山  
野不相君長耕牧自足未嘗爲邊鄙之患向聞強取  
其地建熙河一路殺其老小以數萬計所費不貲而  
河州或云地屬董氈即契丹壻也旣恐闢地未已豈  
不往訴而契丹聞之當謂行將及我此又契丹之疑  
也北邊地近西山勢漸高仰不可爲塘泊之處向聞  
羌官領兵徧植榆柳冀其成長以制虜騎然興於界  
首無不知者昔慶曆嫚書所謂剗立隄防障塞要路

魏公無  
慮氣安  
有修城  
備漆畏  
敵疑忌  
而可以  
為國者

無以異矣然此豈足恃以為固哉但使契丹之疑也  
河朔義勇民兵置之歲久耳目已熟將校甚整教習  
亦精而忽團保甲一道紛然義勇舊人十去其七或  
撥入保甲或放而歸農得增數之虛名破可用之成  
法此又徒使契丹之疑也自虜人辨理疆界河朔公  
邊與近裏州郡一例差官檢計脩築城壘開濠壕塹  
冀北京役者尤眾敵樓戰棚之類悉加換葺增置防  
城之具率令備足逐處兵甲器械累次差官檢視排  
梁張盤前後非一又諸處剋都作院頒降新樣廣謀  
造作澶州等處剋為戰車此皆眾目所覩諜者易窺

且虜人未有動作彼無秋毫之損而我已費財殫力  
先自困弊此又徒使契丹之疑也近復置立河北三  
十七將各專軍政縣不得關防雄州地控極邊亦設  
將屯兵其隨軍衣物有令兵士自辦者有令本營增  
置者有令官造給付者以至預籍上戶車馬騾驢准  
備隨行明作出征次第不可蓋掩此又深使契丹之  
疑也夫北虜素爲敵國設如此則積疑起事不得不  
然亦其善自爲謀者也今橫使再至初示偃蹇以探  
朝廷况代北與雄州素有定界若優容而與之恐虜  
情無厭浸淫不已誠如聖詔所諭固不可與或因其



不許虜遂持此以爲已直縱未大舉勢必漸擾諸邊  
卒陳盟好蓋有因緣而致此者乃煩明詔訪以待過  
備禦之要自顧老朽夙夜思之其將何策上助聖笑  
臣聞言未及而言謂之躁言及之而不言謂之隱臣  
昔曾言散青苗錢不便事而言者輒肆厚誣非陛下  
之明幾及大戮自此新法之下雖其間有未協人情  
者實避嫌疑不敢更有論列今親被詔問事繫國家  
安危言及而隱是大不忠罪不容誅矣臣嘗切計始  
爲陛下謀者必曰自祖宗以來紀綱法度率多因循  
苟簡非變之不可也治國之本當先有富彊之術聚

財積穀寓兵於民則可鞭笞四夷盡復唐之故疆然後制作禮樂以文太平故始散青苗錢使民出利所得之利復以爲本但務多取歲增本錢無有定數又爲免役之法自上等以至下戶皆令次第出錢募人應役從來上戶輪當衙前重難故其間時有破敗者今上戶一歲出錢不過三十餘緡安然無事而令下戶素無役者歲歲出錢此則損下戶而益上戶雖百端補救終無善法又役錢之內每歲更納寬剩錢以備他用此謂富國之術也且農民歲納夏秋稅賦一年兩次納不前者始有科校之刑今納青苗與役錢

已是加賦有過限者亦依二稅法科校則是一戶一歲之中常負六次科校民不勝駭矣稍遇水旱則逋負官錢流移失業是已著見孰敢言者又內外置市易務盡籠天下商旅之貨官自取利主以得利爲功主刀必取小商細民遂無所措手加以新制日下更改無常州縣官吏茫然不能詳記稍有違者坐以徒刑雖經赦降去官不得原免監司督責以刻爲明薄法之苛過於告繙故州縣之間官吏惴惴然日苟一日皆以得罪爲幸夫農者國之本也商者能爲國致財者也官吏者助朝廷之教化者也今農者則怨於

猷畝商者則歎於道路官吏則所在不安其職恐陛下不能盡知也夫欲攘捍四夷以興太平而先使邦本困搖衆心離怨振古以來未聞能就此功者也此則陛下始謀者之大誤也陛下有堯舜之聰明知其所誤能改不吝聖人之大德也又今好進之人不顧國家之利害但謂邊事將作富貴可圖獻策以干陛下者必云虜勢已衰特外示驕慢耳以陛下神聖文武若擇將臣領大兵深入虜境則幽薊之地一舉可復此又未之思也今河朔累歲灾傷民力大乏沿邊次邊州郡芻糧不充新選將官例皆羸勇保甲新點

遷侵地  
罷將官  
如以便  
是契丹  
爲市  
爲客

未經訓練若驅重兵頓于堅城之下糧道不給虜人  
四向來援腹背受敵欲退不可其將奈何太宗時雖  
曹彬米信名德宿將猶以致岐溝之敗也臣愚今爲  
陛下計謂宜遣使來報優致禮幣開示大信達以至  
誠具言朝廷向來興作乃修備之常與北朝通好之  
久自古所無豈有他意恐爲謀者所誤耳且疆土素  
定當如舊界請命邊吏退近者侵占之地不可持此  
造端欲隳祖宗累世之好永篤信約兩絕嫌疑望陛  
下將契丹所疑之事如將官之類因而罷去以釋虜  
疑萬一聽伏則可遷延歲月陛下益養民愛力選賢

任能踈遠姦諛進用忠鯁使天下悅服邊備日修塞  
下有餘粟帑中有美財侯虜果有衰亂之形然後一  
振威武恢復舊疆快忠義不平之心雪祖宗累朝之  
憤陛下功德赫然如日照耀無窮矣如其不伏決欲  
背約則河北諸州深溝高壘足以自守虜人果來入  
寇所在之兵可以伺便驅逐大將持重以全取勝自  
此彼來我往一勝一負兵家之常不可前料卽未知  
何時復遂休息也至於清野之法則難盡行倉卒之  
際不可率一境之民比戶將牛馬餵糧盡入城郭蓋  
至時或有往保生寨者或有挈家渡河者或有留人

看守莊舍者或有就近入居城郭者當使人得自便  
方保安全固不可按圖先定必令城郭而居雖有嚴  
令必不從也在祖宗朝屢經北虜之擾鄉民避寇率  
一如此願朝廷不須一一處置臣歷事三朝十年輔  
相宦已極品歸榮故鄉萬事無不足者年將七十宿  
疹在身每思告老而去庶全始終此緣聖問之及因  
敢一貢盡言非嫉善也非求進也用是只以自信今  
天下之人漸不敢以直言爲獻臣實不忍負累朝眷  
遇之恩猶覲愚瞽一悟聖心爲社稷之盛福惟陛下  
加察賜以不疑非獨老臣幸甚天下幸甚

答詔問北邊事宜

富弼

神宗熙寧八年樞密副使富弼上

臣素乏才業忝塵二府昔在壯時精力尚不及人今老且病氣志衰耗何足備大政之間然臣實非已見今但舉衆人所得聞者錄以上奏惟聖明裁擇臣五六年來切聞綏州囉兀熙河辰錦戎瀘交趾咸議用兵唯交趾中寢其餘諸路皆有攻討或剋獲或喪失卽傳播天下而綏州囉兀熙河始初興舉便傳聞云朝廷必復靈夏平賀蘭旣又大傳有人上平燕之策此說尤盛北虜必已探知相繼彼復聞朝廷修整器



甲簡練兵伍增築城壘積聚芻糧加之招致高麗爲牽制之援近又分置河北三十六將按閱愈急喧布漸久事機參合此虜人所以先期啟釁以發代北侵境之端而不肯已也其平賀蘭平燕之策虛實固不可知然傳者既多且久萬口一詞誰敢辯白設有辯者遠夷何以敢信今釁端已成代北各屯兵馬境上爭議逾年未決橫使再至事歸朝廷此邊臣之職而朝廷自當之則恐理難款緩便要可否違之則兵立起而患速順之則河東斥候窄狹爲患雖遲而久遠不便臣謂不若一委邊臣令其堅持久來圖籍疆界

爲据使其盡力交相詰難然北虜非不自知理曲蓋  
故欲生事遂興干戈以氣吞我以勢陵我是欲奪我  
累年所作之事彼非敢無故驟興此端實有以致其  
來也惟陛下深省熟慮不可獨謂虜人結讐背盟也  
彼若萬一入寇事不得已我持嚴兵以待之來則禦  
戰去則備守此自古中國防邊之要也若朝廷乘忿  
便欲深入討擊臣實慮萬一差跌其害非細更或與  
西夏爲犄角之勢則朝廷宵旰矣事既至此邊奏警  
急兵糧皆缺窘於應用須防四方凶徒必有觀望者  
謂國家方事外虜其力不能制我遂相嘯聚蜂蟬而

起事將柰何臣願陛下以宗社爲憂生民爲念納汗  
含垢且求安靜更俟歲時豐稔窮困稍蘇流亡漸歸  
民粗安業稅賦不失倉廩不虛恩信宣布人心固結  
然後別圖萬全之舉永免一跌之失此天下之願也  
亦臣之志也向又喧傳陛下決爲親征之謀中外益  
更憂懼心殫膽落陛下雖英睿天縱必有成筭然太  
平天子與創業之君事體絕異尤不可槩然輕舉又  
恐朝廷且作聲勢固無實心事若如此乃是我以虛  
聲而邀彼實來也張虛聲者必有踈畧之虞作實來  
者必有周密之慮以踈畧之虞而當周密之計其成

敗豈不灼然耶假令入計得志而還此契丹一種事  
力自大况又夏國喃廝囉高麗黑水女真達靼等諸  
蕃爲之黨援其勢必難殄城使無噍類卽此結成邊  
患卒無已時大非長轡遠馭之道也臣切謂因橫使  
之來且可選人以其疑我者數事開懷喻之云朝廷  
凡所爲武備乃中國常事非願外興征伐向者用武  
之地皆小蕃有過者朝廷須合問罪若吾二大邦通  
好已是七十餘年無故安肯輒欲破壞恐是奸人造  
作妄興闖諜或是彼聞我整肅邊事卽疑我有所  
作我旣知之豈免大爲準擬蓋因此互相疑惑

豐隙遂有今日爭理朝廷更有可說諸事但盡說之  
須令釋然無惑乃一助也橫使始不納卽遣報聘者  
於戎主前具道此意庶幾一聽必有所益緣彼大藉  
朝廷歲興方成國計既有顧藉之心豈無安靜之欲  
只以疑情未釋遂成倔強若與開解明白必肯回心  
向化凡百芥蒂盡可脫畧苟互相疑忌兩情不通禍  
患日深必成後悔臣歷觀春秋洎戰國時諸侯遞相  
征伐兩兵已合飛矢在上行人在下辯說解釋遂各  
交締而退却復盟好者比比皆是况今豐端漸啟兵  
尚未合且可多方以理解釋或能有濟與其用征戰

而決勝負萬萬不侔也彼此致疑及禦戎二事臣並  
得之羣論非出胸臆是皆目前衆所共知所共見必  
然之理非事外別生奇異之策也臣更望陛下兼求  
博訪不宜專聽一偏之說恐有迎合聖意及畏避用  
事之人不敢盡以實事上奏有誤國家大計臣今所  
以及此者切聞去春以久旱陛下特降手詔許人極  
陳朝政得失中外歡抃咸謂聖情已大開悟尋聞上  
章論列者甚多隨而或遭貶降陛下殊不以手詔召  
人極諫爲意優容之反令得罪士大夫自此皆務糾  
結忠藎之語不敢復出于口臣謂下情不能上達者

通朝政莫大之患也願陛下深思極慮之早令天下  
受賜及朝廷無事不勝大幸此奏出於忽遽又且欲  
事理明白不敢加飾及援据古事但直書利害而已  
昔楚相子反謂區區之宋尚有不欺人之臣况中原  
大國已與北虜結隙今若更不推誠以待之則恐不  
能解疑釋惑也伏乞聖造特加裁恕時以使相韓琦  
等再來議地界神宗特出手詔問計弼等答詔皆主  
不與之論會王安石再入相獨言將欲取之必故與  
之以筆畫地圖授韓琦悉與之蓋東西棄地五百餘  
里實鎮承安石風旨行之其後元祐初諫官蘇轍論  
續并地之罪其言云自古四夷外侮必於新故更代  
之際主少國疑之時故孝惠高后之世匈奴桀驁唐  
太宗初卽位突厥安至渭北今二虜蓄謀安危未分  
折衝御侮專在韓弼去歲虜使入朝見續在位使副

相顧反唇微笑此何意也虜誠見鎮無狀舉祖宗七  
百里之地無故與之今其為政我之利也故喜而竊  
笑耳政姦入國必至於是北虜地界之謀出於耶律  
用正今以為相虜以開國百里而相鎮臣愚所未論也臣聞  
而朝廷以促國七百里而相鎮臣愚所未論也臣聞  
之河東父老云韓琦為太原欲制范家東堡范家西  
堡及赤泥膠三指擲弓箭手恐虜以為言迺召弓箭  
手節級高正使幹其事正集其徒於所選臺之南侯  
何虜人樵採者輒毆傷之虜以為言則曰此漢界也  
故爭之往反十數卒得其要約自所選臺以南為漢  
界而單弓箭手大獲其用韓鎮定地界皆割與之主  
戶為皆委之而產老勿大哭所不忍聞遂以天地嶺  
為界天地嶺距廝羅臺上二十五里異時虜欲祈  
福修天地廟必牒安撫司而後敢入以明廟之屬漢  
今也亦為虜有高大正者土豪也有威名於北方番漢  
日之為高大王而天地廟神亦曰高大王廟方割屬  
虜時正推膺大慟謂其徒曰我兄嫂今日陷番百姓  
數千人皆大哭鎮為侍從仗節出使而賣國黨寇曾  
不如一弓箭手節級此而可忍孰不可忍正數年前  
為大皇帝巡檢年七十餘每見人論鎮與燕復之姦



卽欲食其肉復火山軍三界首唐隆鎮一商人也入  
粟得司戶參軍韓絳爲宣撫始奏換武階邊人疑其  
細作而續與之交私狎昵無所不至呼爲燕二亦謂  
一哥割地之謀皆出於復虜使梁未蕭禧本以橫山  
下大川爲界至七蕃鎮下乃斗入漢地圍裏此嶺凡  
二十八里意欲自此直至分水嶺爲界邊民大怒有  
焦家方箭手三百人毆擊北使奪下梁未等柱斧交  
倚虜不敢復南仍自七蕃嶺北轉而西以大川爲界  
燕復至鴈門寨亦爲弓箭手所毆制劄入寨閉門僅  
免由此觀之邊民皆忠憤不伏而北虜亦自知理曲  
無詞使鎮稍有臣子忠孝不負本朝之心則七百里  
之地必不至于寇仇之境也火山靈化之間山林饒  
富財用之數也自盧牙平荷葉山雪山一帶直走瓦  
窪塢南此百餘里而東西十五里林木蘢蔚足以供  
一路麋鹿雉兔足以飽數州今皆失之雪山有廟河  
東一路往幣所走今亦爲夷鬼矣人神共怨皆怨之  
罪中園從宋控扼卓望形勢之地如五蕃嶺六蕃嶺  
七蕃嶺黃鬼山之類人皆爲虜巢下視折代人馬可  
數異時用精兵數十萬人未易復取而用兵之策誰  
敢復議以此知續賣國之罪百世不磨若祖宗有靈

必不赦鎮陛下近降出吳居厚王子京蹇周輔之流  
皆以立法害民耳出令改其法區不數月而民復業矣  
如鎮之罪智者不能復安疆垣勿之患有不可測者而  
陛下獨赦之臣不勝爲國疾女效憂深思遠之至伏乞  
檢臣前後童疏下三省兩制雜議正鎮之罪以示四  
方有不如意臣言甘伏上訕之罪并鎮竟罷相

乞撫存北虜

趙 適

徽宗宣和四年真定府路安撫趙適上

臣伏准今月十三日樞密院劄子奉御筆虜界爲女  
真所侵兵勢瓦解切慮奔潰侵軼逼犯邊境仰河北  
諸路帥司依降指揮團結兵馬編排器甲準備不測  
勾抽上邊使喚仍先具知委奏聞除已具知委及逐  
時探到北界事節次附入內內侍省遞奏聞去訖臣

切詳北虜自澶淵旣盟之後歲省用兵之費國享重  
幣之利虜自知得計守盟修好皆其誠心然累年以  
來虜酋失德上下離叛人不爲用女真勃海寇亂其  
國征伐不已敗衄相繼境土侵削士馬凋殘財力匱  
耗常疑中國密有窺伺左枝右梧困弊日甚恭惟陛  
下好生之德深洽民心帝王之舉必度萬全况臣嘗  
親奉玉音屢被詔劄每念南北歡好方固祖宗盟誓  
謂非細事不可少有引惹造端生釁而虜殊不知聖  
神加惠兩國之意如此今茲睿旨特處他寇與奔潰  
之衆不測侵軼姑示備禦之計廟謨甚遠預爲之防

然臣叨承闕寄職所當言苟有管見豈敢緘默伏觀  
邊報近者虜酋獵於白水川女直掩其無備全軍陷  
沒虜酋不知存亡虜中震擾未見所立若復調兵上  
邊虜將謂中國起乘其弊疑隙旣開何可復釋唯當  
示之安靜致其懷服臣愚切謂耶律氏既有沙漠歷  
年甚多虜人習熟貴其種類設有姦雄誰肯推服仰  
惟朝廷與虜兄弟之國共守盟好百有餘載

陷北記

胡嶠

同州郃陽縣令胡嶠居契丹七年周廣順三年亡歸  
中國畧能道其所見云自幽州西北入居庸關明日

又西北入石門關關路崖狹一夫可以當百此中國  
控扼契丹之險也又三日至可汗州南望五臺山其  
一峯最高者東臺也又三日至新武州西北行五十  
里有鷄鳴山云唐太宗北伐聞鷄鳴于此因以名山  
明日入永定關北此唐故關也又四日至歸化州又  
三曰登天嶺嶺東西連亘有路北下四顧冥然黃雲  
白草不可窮極契丹謂嶠曰此辭鄉嶺也可一南望  
而爲永訣同行者皆慟哭徃徃絕而復蘇又行三四  
日至黑榆林時七月寒如深冬又明日入長五  
十里高崖峻谷仰不見日而寒尤甚已中地氣

稍溫又行二日度湟水又明日渡黑水又二日至湯  
城淀地氣最溫契丹苦大寒則就溫于此其水泉清  
冷草軟如茸可藉以寢而多異花記其二種一曰旱  
金大如掌金色燦人一日青囊如中國金燈而色類  
藍可愛又二日至儀坤州渡麝香河自幽州至此無  
里候其所向不知爲南北又二日至赤崖蕭翰與世  
宗兀欲相擊遂及述律后戰于沙河述律兵敗而北  
兀欲追至獨樹渡遂囚述律于樸馬山又行三日遂  
至上京所謂西樓也西樓有邑屋市肆交易無錢而  
用布有綾錦諸工作官者翰林伎術教坊角觝秀才

僧尼道士等皆中國人而并汾幽薊之人尤多自上  
京東去四十里至珍珠寨始食菜明日東行地勢漸  
高西望平地松林鬱然數十里遂入平川多草木始  
食西瓜云契丹破回紇得此種以牛糞覆棚而種大  
如中國冬瓜而味甘又行東至裏潭始有柳而水草  
豐美有息鷄草尤美而本大馬食不過十本而飽自  
裏潭入大山行十餘日而出過一大林長二三里皆  
蕪荑枝葉有芒刺如箭羽其地皆無草兀欲時卓帳  
于此會部人葬太宗自此西南行日六十里行七日  
至大山門兩高山相去一里而長松豐草珍禽異獸

野卉有屋室碑石曰陵所元欲入祭諸部大人惟執  
祭器者得入入而門闔明日開門曰拋蓋禮畢問其  
禮皆秘不肯言嶠所目見囚述律葬太宗等事與中  
國所記差異已而翰得罪被鑕嶠與部曲東之福州  
福州翰所治也嶠等東行過一山名十三山云此西  
南去幽州二千里又東行數日過衛州有居人三十  
餘家蓋契丹初虞中國衛州人築城而居之嶠至福  
州而契丹多憐嶠教其逃歸嶠因得其諸國種類遠  
近云距契丹國東至于海有鉄甸其族野居皮帳而  
人剛勇其地少草木水鹹濁色如血澄之久而後可



飲又東女真善射多牛鹿野狗其人無定居行以牛  
負物遇雨則張革爲屋常作鹿鳴呼鹿而射之食其  
生肉能釀麋爲酒醉則縛之而睡醒而後解不然則  
殺人又東南渤海又東遼國皆與契丹畧同而人好  
殺戮又南至于榆關矣西南至儒州皆故漢地西則  
突厥回紇西北至嫪厥律其人長大髦頭酋長全其  
髮盛以紫囊池苦寒水出大魚契丹仰食又多黑白  
黃貂鼠皮北方諸國皆仰足其人最勇隣國不敢侵  
又其西轄戛又其北單于突厥皆與嫪厥律畧同又  
北黑車子善作車帳其人知孝義地貧無所產云契

丹之先常役回紇後背之走黑車子始學作車帳又  
北牛蹄突厥人身牛足其地尤寒水曰瓠臚河夏秋  
水厚二尺春冬水徹底常燒噐銷冰乃得飲東北至  
鞭劫子其人髦首披布爲衣不鞍而騎大弓長箭尤  
善射遇人輒殺而生食其肉契丹等國皆畏之契丹  
五騎遇一鞭劫子則皆散走其國三面皆室韋一曰  
室韋二曰黃頭室韋三曰獸室韋其地多銅鉄金銀  
其人工巧銅鉄諸噐皆精好善織毛錦地尤寒馬溺  
至地成水堆又北狗國人身狗首長毛不衣手搏猛  
獸語爲犬嗥其妻皆人能漢語生男爲狗女爲人自

婚嫁穴居食生而妻女人食云嘗有中國人至其國其妻憐之使逃歸與其筓十餘隻教其走十餘里遺一筓狗夫追之見其家物必銜而歸則不能追矣其說如此又曰契丹堂選百里馬二十匹遣十人齎軋鈔北行窮其所見其人自黑車子歷牛蹄國以北行一年經四十三城居人多以木皮爲屋其語言無譯者不知其國地山川部族名號其地氣遇平地則溫和山林則寒烈三十三城得一人能鉄甸語其言頗可解云地名頡利烏干邪堰云自此以北龍蛇猛獸魑魅羣行不可往矣其人乃還此北荒之極也契

丹謂嶠曰夷狄之人豈能勝中國然晉所以敗者主暗而臣不忠因具道諸國事白子歸悉以語漢人努力事其主無爲夷狄所虜吾國非入境也嶠歸錄以爲記云

行程錄

王 魯

初奉使者止達幽州後至中京又至上京或西涼淀北安州泰山長泊自雄州白溝驛度河四十里至新城縣古督亢亭之地又十里至涿州北渡涿水范水劉李河六十里至良鄉縣度盧溝河六十里至幽州號燕京子城就羅郭西南爲之正南曰教夏門內有

漢武  
復山  
州山非  
漢平

元和殿洪武殿東門曰宣和城中坊門皆有樓有惘  
忠寺本唐太宗爲征遼陣亡將士所造又有開泰寺  
魏王耶律漢寧造皆邀朝士遊觀城南門外有千越  
王廨爲宴集之所門外永平館舊名碣石館請和後  
易之南卽桑乾河出北門過長城延芳淀四十里孫  
侯館改爲望京館稍移故處望楮谷山五龍池過溫  
餘河大夏城坡坡西北卽涼淀避暑之地五十里至  
順州東北過曰嶼河望銀冶山又有黃羅螺盤牛闌  
山七十里至槽州自北漸入山五十里至金溝館川  
源平廣謂之金溝淀國主嘗于此過冬自此入山詰

曲登涉無復里堠但以馬行記日景而約其里數過  
朝鯉河亦名七度河九十里至古北口兩旁峻崖中  
有路僅容車軌口北有舖穀弓連繩本范陽防扼奚  
契丹之所最爲隘東然幽州東趨營平州甚平坦自  
頃犯邊多由斯出又度德勝嶺盤道數層俗名思鄉  
嶺八十里至新館過雕窠嶺偏槍嶺四十里至卧如  
來錦蓋山中有卧佛像故也過烏灤河東有灤州因  
河爲名又過墨斗嶺亦名渡雲嶺長二十里許又過  
芹萊嶺至十里至柳河館河在館傍西北有鉄冶多  
渤海人所居就河渡沙石練得成鉄渤海俗每歲時

聚會作樂先命善歌舞者數輩前行士女相隨更相  
唱和周旋宛轉號曰踏鉗所居室皆就山崖開門通  
松亭嶺甚險峻七十里至打造部落館雖有番戶百  
餘編荆爲籬鍛鉄爲軍器東南行五十里至山館  
八十里至鹿兒峽館過蝦蟆嶺一里至鉄漿館過  
石子嶺自北漸入山七十里至當谷館居民多遊車  
者云渤海人正東馬山山多禽獸林木國主多於  
此打圍八十里至通天館二十里至中東大定府城  
垣大小方圓纔四里許門但重屋無築閣之制南門  
曰朱夏門內夾道步廊多坊門又曰陽德閭闔城內

西南隅岡上有寺城南有園圃宴射之所自過古北口卽蕃境居人草庵板屋亦務耕種但無桑柘所種皆從隴上蓋虞吹沙所壅山中長松鬱然深谷中多燒炭爲業時將畜牧牛馬橐駝尤多青羊黃豕亦有犂車帳逐水草射獵食止麋粥炒糲

行程錄

富 粥

富鄭公之使北朝也自中京正北八十里至臨都館又四十里至官窰館又七十里至松山館又七十里至崇信館又九十里至廣寧館又五十里至姚家寨館又五十里至成寧館又三十里度潢水石橋旁有



饒州蓋唐朝嘗于契丹置饒樂州也今渤海人居之  
又五十里至保和館度黑河七十里至宣化館又五  
十里至長泰館西二十里許有佛寺民社云卽祖州  
亦有祖山山中有阿保機廟四十里至上京臨潢府  
自過崇信館卽契丹舊境蓋其南皆奚地也又西門  
門曰金德內有臨潢館子城東門曰順陽入門北行  
至景福門又至承天門內有昭德宣政二殿皆東向  
其毡廬亦皆東向臨潢西北二百餘里號涼淀在漫  
頭山南避暑之處多豐草穠尺餘卽堅冰云

荆川先生右編卷之二十六終